

श्रद्धासुमन खेजड़ली शहीदी दिवस पर विशेष कविता

बिश्नोई समाज री महाबलिदान वीर गाथा खेजड़ली री

शान्ति दूत बिश्नोइयां री,

वीर रक्त री ताती धारा ।

बाँ रै हिवडै भारी चोट करी,

हुआ माणस माणस रा हत्यारा ॥1॥

जद नियम तोड़ पर्यावरण रा,

जद गुरु भक्तां पर वार कर्या हो ।

खाली हाथाँ मिनखां पर दुष्टा नै,

कुल्हाड़ियाँ हूँ वार कर्यो हो ॥2॥

खेजड़ली री पावन-पुन्न भोम पर,

जुल्मी जुल्म करण नै आय खड्ग्या हा ।

काटण खेजड़ी खेजड़ली में जद,

बै ले कुल्हाड़िया हाथाँ आय बड्ग्या हा ॥3॥

बे आपणै बच्यां ज्युँ प्रेम कियो रूँखा नै,

अर हरदम मोकळो बाने दुलार दियो ।

सुण सुण बातों बे रूँख बाढ़ण री,

बिष्णोइयाँ रो हिवडो चित्कार कियो ॥4॥

बे सगळा लियां कुल्हाड़ा हाथां में,

गिरधर भण्डारी रै हुकमां लाग्या ।

माँ अमृतादेवी अर तीन बेटियाँ जागी,

साको सुण हगळा ही बिश्नोई जाग्या ॥5॥

जद काटण खेजड़ी भिड्ग्या बैरी,

खेजड़ली में म्हारा जवान अड्ग्या ऐड़ा ।

जियां रामायण रा अंगद अर हनुमान हा,

ज्युँ कुरुक्षेत्र रा भीव-अर्जून अड्ग्या जैड़ा ॥6॥

काया अर माया रो मोह छोड़,

आया सब राखण लाज रूँखा री ।

सगळा रूँखा गै जाय चिमटग्या,

लाग्या वीर झट झालण जुल्मां री ॥7॥

सिर साँठे ही जे रूँख बचै,

गुरु नियम पालण में कटै गळा ।

बानै पग नहीं धरण दियो बिष्णोइये,

रक्षा रा आया हा जद दिन बिरला ॥8॥

औ जुगा जुगा रो धर्म आपणों,

बचावण नै आज उट्ग्या सरसी ।

घूंटो पाहळ गो दिया गुरु जी,

रूँखा साँटे आज कट्या सरसी ॥9॥

आज सत जाँचै आय म्हारो,
अभी घड़ियाँ म्हारी बे जागी है।
गुरु जाम्भै जी रा बिश्नोइयाँ पर,
आज आँख दुष्टां री लागी है ॥10॥

सिर कट जावै, पर म्हें हटां नहीं,
आज वीरां नै बा आण अडिकै है।
पीपासर सम्भराथल अर मुकाम री,
अर भारत माँ री शान अडिकै है ॥11॥

आज ऊद्धो कसो रूपो अर वरसिंह,
विल्हो रणधीर परमानन्द रो माण अडिकै हो।
गुरु जम्भेश्वर विष्णु धर्म रै रसियां रो,
बिश्नोइयाँ नै मोटो बलिदान अडिकै हो ॥12॥

पर्यावरण री पत अर लाज राखी बे,
समाज रो माण राक्षयो चोटी पर।
हा पक्का चेला गुरु जम्भेश्वर रा,
मिल अर जाय चढ़या बे कसौटी पर ॥13॥

बे रूँख नहीं कोई कटण दिया,
जा सिर बे खेजड़ली में अंवार दिया।
सब जय बोलता विष्णु जी री,
आपणा बे कट कुहाड़ाँ प्राण दिया ॥14॥

जद तीन सैंकड़ा अर तिरेसठ,
बिश्नोई स्त्री-पुरुष कुर्बान हुआ।
देख बाँ वीरा बाक फाटगी कारिदा री,
बे गोड़्या हथियार अर कूच हुआ ॥15॥

आ कुर्बानी सुण महाराजा अभय सिंह,
नंगे पाँव भाज्या आया अर माफी माँगी ।
म्हें रूँख अर जीवां री रक्षा करांला,
आं विचारां री लड़ी बाँ रै हिवड़ै जागी ॥16॥

भाद्धव सुदी दसमी बार मंगलवार हो,
जद जोधाणै रा हा सिंहासन डोल्या।
कर श्री गणेश चिपको आन्दोलण रो,
बणा धाम खेजड़ली नै, वीर प्राण छोड़ चल्या ॥17॥

खूब लड़्या बिश्नोई भारत माँ रा,
छोड़ जीवन र चार दिनां रै बासै नै।
खूब झूझ्या आपणा नावं अमर करग्या,
घणी पाळी बे बीर जीवण री आशा नै ॥18॥

आज ओ सन्देशों मेरो बाँ वीरां नै,

अरे इसा बीर जण्यां बाँ मावाँ नै ।
समाज रै मोटा वीरां अर कवियाँ नै,
माँ-बहण कटी अर कटै बाँ भाइयाँ नै ॥19॥

युगां युगां सँ जग में आ पहली घटना है,
कुर्बानी रो ओ इतिहास नहीं मिलै लो ।
जद जद याद करो ला थै आ कुर्बानी,
थारी आँखा सँ झर झर झरणों झड़ै लो ॥20॥

“पृथ्वीसिंह” मरणों तो सब नै होयसी,
पण ऐड़ी वीर री मौत कटै मिल सी ।

खेजड़ली मैं तन अर नाँव पूजी जै,
आ जम्भगुरु री जोत कटै मिल सी ॥21॥

पृथ्वीसिंह बैनीवाल बिश्नोई,

संस्थापक सदस्य, जाम्हाणी साहित्य अकादमी, बीकानेर एवं संयुक्त सचिव एवं प्रैस प्रभारी,
श्री बिश्नोई सभा, पंचकूला, सैक्टर-15, पंचकूला-134113 (हरियाणा)-094676.94029